

国朝耆献类征初编



國朝耆類徵初編卷三百四十九目錄

忠義十九

班第

鄂容安

彰薩

浩里善等

傅澤布

福太等

貝多爾

進扎布等

晉見龍

王世興等

巴泰

諾克圖等

和起

永德

哈三等

楊朝柱

楊玉柱等

五奇納

額林親等

巴克散

阿必達等

密薩爾海

塔克慎等

密三

阿木拉扎等

呢薩爾圖

克勒車爾等

1

國朝耆獻類徵初編卷三百四十九

通奉大夫前署江西巡撫江西布政使司布政使湘陰李桓輯

忠義十九

班第

班第蒙古鑲黃旗人姓博爾濟吉特氏康熙五十六年由官學生授內閣中書五十七年二月遷欽天監五官正十二月遷理藩院堂主事五十八年遷內閣侍讀六十一年授內閣侍讀學士雍正二年擢內閣學士三年四月打箭鑪外裏塘巴塘乍了察木多及雲南之中甸畫歸內地魯隆宗諸部落歸達賴喇嘛轄 詔班第偕副都統宗室鄂齊赴西藏宣諭五年遷理藩院侍郎尋因辦事

未協 命仍在學士上行走九年五月 賜孔雀翎十二月補公

中佐領十年充繙譯鄉試正考官十一年軍機處行走十三年九月署工部侍郎時恭纂 世宗憲皇帝實錄充副總裁乾隆元年十一月署兵部侍郎十二月充經筵講官三年授兵部侍郎四年六月兼理藩院侍郎尋擢湖廣總督十月奏修隄塘補倉貯各事諭曰不必欲速但實心竭力爲之十一月奏言臣察閱營伍立賞格勤訓練期兵強餉實又詞訟案嚴禁積蠹把持得 旨嘉獎十二月以湖南鎮筸永綏苗人不法偕巡撫馮光裕等籌剿閱兩月軍務告竣 諭獎其成功速交部議敘五年丁母憂六年正月仍在軍機處行走三月授兵部尚書兼議政大臣八年兼管理藩院

事十一年九月署山西巡撫十二月諭曰準噶爾見遣使進貢

班第有應辦事件著來京供職尋兼正藍旗滿洲都統十二年充
會典館正總裁十三年正月授內大臣赴金川軍營辦理糧餉四
月加太子少保班第奏糧運四事一兵役分別支折銀米省運費
一內地運費口糧量加給一口外最險糧站增賞銀一臺員閒委
丞倅州縣稽察軍機大臣議行六月赴軍前督攻昔嶺一路七月
上聞四川巡撫紀山聽州縣派徵累民命班第回川查察閏七
月解紀山任班第署巡撫八月復赴軍前十月諭曰朕命班第
前往四川雖爲辦理糧運用兵非其專責但伊身爲本兵且係軍
機大臣於軍中攻剿事宜及將弁功罪皆伊職所在不得以專辦

糧餉遂一切置之膜外乃伊見軍務未能速竣卽不肯任其事惟請另派大臣經理而於訥親張廣泗之乖張退縮老師糜餉初未據實入告及降旨詢問伊於張廣泗之罪直陳無隱而一字不及訥親爲大臣者固宜如是乎在伊自謂辦餉無誤卽爲克盡己職其他自有任其咎者惟欲脫身事外爲自全計而無吉凶同患之心居心若此國事其何賴焉班第不稱兵部尙書之任但辦理糧運尙屬妥協著從寬降爲侍郎十四年 賞副都統銜由四川赴青海辦事十五年四月調赴西藏辦事未至西藏郡王珠爾默特那木扎勒謀叛駐藏都統傅清左都御史拉布敦設計誅之旋爲逆黨羅卜藏扎什所害十二月班第抵藏羅卜藏扎什等伏誅十

六年授都統銜 諭防準噶爾窺藏十七年回京仍在軍機處行走補正紅旗漢軍都統兼管理藩院事十八年正月署兩廣總督三月緝獲增城東莞奸民王亮臣等置之法十月奏言廣東庫貯礮械甚多皆前蕩平藩逆及海寇時所繳日就朽壞可惜請將完好者修整餘鎔鐵備用 上嘉之十九年閏四月 召回京授兵部尙書赴北路軍營署定邊左副將軍是時準噶爾內亂杜爾伯特台吉策凌烏巴什策凌蒙克輝特台吉阿睦爾撒納和碩特台吉班珠爾等相繼降陳準噶爾台吉達瓦齊昏暴狀 詔定於明歲進剿 諭班第籌辦軍務九月奏言軍營所需駝馬牛羊解到時宜妥收備用扎布堪呢圭等處冬令暖饒水草臣檄喀爾喀親

王額沁沁多爾濟等赴彼督牧又言準噶爾屬之烏梁海居阿爾
台以內今春誑言投順同扎哈沁宰桑瑪木特掠阿睦爾撒納妻
孥阻歸順路應懲創示威臣檄參贊大臣薩喇勒努三等帶兵往
剿報 聞十月奏擒烏梁海宰桑車赤倫等收戶口千餘復遣兵
擒瑪木特及通瑪木特盡收其屬 諭曰班第自到軍營以來奮
勇果斷調遣合宜深屬可嘉著賞給世襲子爵補授正黃旗領侍
衛內大臣仍賞銀一千兩十二月授定北將軍來京 陛見言臣
自烏里雅蘇臺軍營啟行至推河見阿睦爾撒納示以軍營應辦
事宜並與商明年二月間赴額爾齊斯屯田應遣兵一萬據形勢
後隊兵二萬整頓繼進準噶爾眾心已叛大軍一到易於成功又

額爾齊斯爲杜爾伯特原屯地臣令策凌及策凌蒙克派員協往督耕又言出征滿洲蒙古及索倫巴爾呼喀爾喀厄魯特各兵應照例均給廩食攜炒米麪牛羊乾魚並鹽菜銀初到軍營時亦照例資給又原議進兵口糧給兩月見議二月內哨探兵先進應改帶四月軍機大臣議如所請二十年正月 詔定西北兩路軍營大臣名次北路班第爲帥定邊左副將軍阿睦爾撒納爲副領哨探兵先進額駙色布騰巴爾珠爾郡王品級青滾雜卜內大臣瑪木特奉天將軍阿蘭泰爲參贊西路定西將軍永常爲帥定邊右副將軍薩喇勒爲副領哨探兵先進郡王班珠爾貝勒品級扎拉豐阿內大臣鄂容安爲參贊兩路軍至博羅塔拉會合時奏事首

班第尋奏言收獲包沁扎哈沁等眾謀哈薩克掠達瓦齊牧準噶爾生計蹙臣與阿睦爾撒納等議於二月內先後進剿諭曰前原議於四月內進兵且未深知達瓦齊情形故令於額爾齊斯畱兵屯田今進兵甚早而達瓦齊之力已窮兵到即可成功其額爾齊斯仍需畱兵屯田與否班第等另行籌辦此次進兵特爲平定準噶爾將阿睦爾撒納等四衛喇特封爲四汗俾所部咸登衽席大兵奏凱後阿睦爾撒納策凌等帶領新降人眾前赴熱河入覲所屬人等卽畱居原游牧處俾無往返之勞二月奏言平定準噶爾後額爾齊斯亦需駐兵管新降人眾請照原議屯田諭曰額爾齊斯仍需屯田著照班第所請行至大功告成後伊犁已畱

重兵兼有大臣駐劄額爾齊斯距阿爾台甚近何必更設兵駐防
著諭班第知之尋奏言臣前在京與軍機大臣會奏哨探兵及續
進大兵需馬七萬餘今陸續解到除以二萬六百餘匹應付六千
哨探兵已於二月十二日起程臣俟察哈爾等兵到卽將糧馬妥
辦帶領前進其續到兵令喀爾喀親王成衮札布等監辦事畢成
衮札布赴屯田地方辦事又奏哨探兵起程後臣卽派屯田兵二
千起程報聞三月奏領察哈爾兵丁於二月二十日起程令永
貴將後隊官兵口糧辦理支給餘駝酌帶糧餉繼進諭曰此奏
殊未明晰見在大兵鼓勇直入成功指日可期官兵已攜帶口糧
四箇月又何須額外帶往此或預備賞賚之用或從前議帶兩月

口糧後復定爲四箇月而於官兵起程時未及滿支今特爲之補運均未聲明如係帶往預備賞賚之用尙屬可行若官兵已攜帶四箇月口糧今復多行裹帶接續前進萬餘兵丁應備口糧若干需用駝隻若干中途保護旣分兵丁之力且防意外之虞殊未妥協著傳諭班第查奏尋復奏言前隊哨探兵千俱帶四箇月口糧臣所領察哈爾兵二千亦帶三箇月口糧並無減半畱存須俟續運者特備賞之項前未攜帶見計眾兵進發後馬駝尙屬有餘臣意酌帶軍餉不特可以接濟大兵而平定準噶爾後一切賞項亦可動支且此解餉兵卽繼大兵前進似可無虞又言臣於三月初六日至齊齊克淖爾查見存馬四千餘尙有未到者前隊兵已出

卡倫三日若俟馬全到始出卡恐相距遠難策應卽將見馬支給
千五百兵乘騎於初八日帶兵起程出巴顏珠爾克卡倫其餘五
百兵俟馬到以次續進又言三月十九日至郭勒阿里克台據阿
睦爾撒納文稱將新投誠宰桑阿巴噶斯哈丹等奏明帶往額爾
齊斯屯田見畱貝勒齊木庫爾候護軍統領塔勒瑪善到時指示
耕種再見在赴察罕呼濟爾後隊續進大兵速行方有益臣卽行
催塔勒瑪善等速往會辦屯務將見領察哈爾千五百兵內選馬
力健者六百與喀爾喀郡王桑齊多爾濟等減裝馳進報聞未
幾奏至額爾齊斯之西喇托輝已與阿睦爾撒納前隊會合諭
曰大兵前進自宜略分先後經朕屢降諭旨令班第與阿睦爾撒

納行程約離數日相繼前進一則阿睦爾撒納係準噶爾人眾知名之人令伊帶哨探兵前行人多認識收服較易再前隊既有哨探兵復有將軍隨後繼進聲勢聯絡軍威益振如合併一處則眾人但知有將軍不復更知有副將軍轉置阿睦爾撒納於無用之地殊與軍行無益前因永常急遽進兵其意惟恐薩喇勒首先成功伊不得同膺爵賞朕已降旨訓飭班第若亦存此意卽屬器量狹小豈朕委任之意卽使阿睦爾撒納先抵伊犁克奏膚功朕於班第亦必加恩若先存急於赴功之意恐反不能承受朕恩矣著伊二人務須酌量相離數日陸續進發不得同在一隊行走又諭曰大兵兩路進前抵博羅塔拉指日卽可蕩平伊犁平定後班

第帶領官兵駐伊犁大臣官員兵丁等需用口糧若照永常所奏
由內地運送則輓輸勞費斷不可行如向該處夷眾責令供應又
未免滋擾朕意平定伊犁後加封投誠各台吉令其自行營束屬
眾至達瓦齊乃準噶爾大台吉其牧養牲畜及伊屬下輸納必多
非諸台吉所應分用應卽以辦給官兵用資口糧再有不敷將帶
往銀兩向厄魯特回人等酌量購買毋得滋擾班第豫爲籌辦四
月奏言臣等會合後於三月三十日至額爾得里克阿睦爾撒納
先進臣等繼發約至察罕呼濟爾會軍四月初六日臣至彼詢知
阿睦爾撒納等未得達瓦齊信已赴額米爾等處臣以大兵旣深
入亟選兵八百令瑪木特阿蘭泰先行往會阿睦爾撒納餘兵八

百臣隨往接應報聞是月班第等既至博羅塔拉行文西路副

將軍薩喇勒會剿而是時達瓦齊在伊犁日縱酒爲樂不設備比

聞大軍至乃調兵潛竄特克斯我軍獲其調兵者日巴朗察罕及

鄂勒錐圖盡知之於是班第等謀徑渡伊犁河協力追擒北路軍

由固勒扎渡口越推墨爾里克嶺進西路軍由喀塔克渡口越克

特滿嶺進疏陳方略諭曰辦理深屬允協達瓦齊若能去逆效

順朕自當另有加恩之處今既潛身遠竄一經擒獲卽當獻俘京

師以彰國法五月大軍入伊犁準噶爾屬眾盡降偵達瓦齊據格

登哦喀喇巴圖魯阿玉錫等以二十餘騎突擊之驚遁捷聞

上獎班第有功封一等誠勇公賜寶石頂四團龍服金黃緜朝